

小倉山房詩集

小倉山房詩集卷二十八

壬寅

錢唐袁枚子才

余七齡上學是康熙壬寅歲也今年又是壬寅矣
感而有作

兩度壬寅意惘然七齡光景記從前
掘衣學見先生禮
買紙初裁認字箋從此蠶魚無飽日
至今筆冢已齊肩
三朝老物誰陪我一盞書燈六十年

贈劉霞裳秀才約爲天台之遊

觥觥問字子雲家奕奕風神動絳紗
似汝瓊枝來立雪
一時愁殺後堂花

能界烏絲寫洛神解吟紅豆學西崑
靈和殿裡風流樹

曾惹蕭郎一斷魂

未免多情枉費才
狎遊頗被里人猜
須知玉貌張雕武
終向儒林傳上來

老我顏唐色界天
熏香傳粉憶當年
自憐一往情深處
也是楞嚴十種仙

空山豈是少年場
偶置花前酒一觴
多謝嚴陶兩公子

替他代饋束修羊

子進怡園
屢惠珍羞

負笈從師意頗殷
向禽心願許平分
天台倘共劉郎去
定有桃花認得君

宿溧陽史少司馬紅泉書屋二十四韻

公諱奕昂

小住紅泉館分明綠野堂
姻家新里第夫子舊宮牆

地烟轡起盈階蘭芷香半空開月榭曲徑置風廊叢桂
黃雲滿修篁碧玉涼標題多翰墨照耀盡天章屏列
花爲障橋橫石作梁相公會結構司馬更裁量瑞室堪
成頌龍門孰敢望我來春正好公喜遠迎將面目爭先
認鬚眉各老蒼卅年如頃刻萬事感滄桑何幸絲蘿託
兼夸宅相良外孫生才八日諸郎都好我排日各持觴酒器三
江俸圖書七寶裝銀杯鐫兩江清俸架上御賜圖書集成當官談舊政
餘事問家常作楷爭磨墨題箋屢啟箱更深僮半睡坐
久夜全忘鳳蠟燒方熾驪歌唱又忙衰年心耿耿後會
事茫茫門外帆將挂閨中話正長女兒留阿父一日抵
千霜

謁史文靖公墓

手供蘋蘩當束修先登華屋後山邱九原尙想師隨會
一疏曾經識馬周蓋代勲華雲影在滿堂絲竹水聲愁
知公泉下猶憐我如此英年也白頭公爲已未館師乍見喜曰如此英年
命擬奏疏一通夸爲第一

題史氏家藏文靖公玉堂歸娶圖

相公歸娶大羅天此事依稀八十年賴有丹青作圖畫
榮華留與世間傳

想見宮花插滿頭珠簾十里下揚州少年恃有天人貌

不控香車控紫騮

卷中書公騎馬

卷中諸老輩題詩

謂徐葆光郭讀罷風前有所思六部元紆諸先生

尚書八州督鴈時花燭可先知

愧作彭宣拜後堂絕無衣鉢繼安昌算來只有歸迎事

曾學黃梁夢一場

枚乞假歸娶時公爲代奏

過陽羨家舒亭明府外出留詩贈之

陽羨停舟暮吾宗出未回絃歌聽雅化公子見清才宴
用家人禮花同笑口開攬瑜空燦爛不見舞人來

未果

是日演劇

訪宗人府丞儲梅夫同年不值

同咏霓裳五十年渡江親訪老神仙九州細數無多客
一見誰知竟少緣寂寂琴書通德里匆匆行李夕陽天
晨星碩果相思切說與郎君倍黯然

周孝侯斬蛟臺

父老談惡蛟將軍磨寶刀刀光入水人不見格鬪三日
風蕭蕭手提蛟頭拔浪起蛟血淋漓紅滿體兩患雖除
一患存擲刀從此讀書矣初師陸士龍再討齊萬年一
時文武才非公誰兼全孤軍陷入窮邊慘杖節掀髯死
無憾可惜朱雲請劍遲佞臣不與蛟同斬鄉人高築土
一邱至今盛夏涼如秋五百毒龍過此愁猶恐將軍在
上頭

孝侯射虎處

英雄得自由一身射虎如射牛英雄受束縛五千壯士
同一哭我生跳盪如雷顛過此不覺心惘惘三十三年

藥綦組從此入山不畏虎

寓西湖漱石居戲作

十幅蒲帆兩筍鞋要從湖上走天台譬如千里尋師去
先訪家鄉舊雨來

坐葛嶺石橋觀新開峭壁

西湖少峭壁平遠皆一狀只有葛嶺峯前年才闢創遠
削鐵稜稜近捫天蕩蕩橫將一重橋架以三疊浪不許
生猿登但容飛鳥傍其上起樓臺空濛迷觀望其下走
盤渦湖光同滉漾明明千萬山到此低頭讓人難攀作
梯我且懸爲帳月夜抱白雲同眠此橋上

偕楊君廷三冒雨遊三生石車攔折矣縛接松柴

而歸

遊山爲雨阻未免爲山嘲勇哉楊夫子冒雨來相招爲
言三生石新得峯巒好何不當寄書同往作搜討一重
復一重怪石果穹隆如將胸塊壘替我安空中歸來走
陂陀忽爾折車脚客歌花緩緩鳥啼泥滑滑興夫無計
施縛以松樹枝路人笑且疑樵叟乘車歸

余生東園大樹巷中周晬遷居今六十五年矣重
過其地

六十衰翁此處生重來屋宇變柴荆想同買德尋隣叟
誰復婆留喚乳名蓬矢挂時桑已盡兒裙前處水猶清
斜陽影裏千回步老淚淋浪獨自傾

海寧陳氏安瀾園席上作

百畝池塘十畝花
擎天老樹綠槎枒
調羹梅也如松古
想見三朝宰相家

鳥歌花笑有餘懽
新得君王駐蹕看
分符窓前萬竿竹
年年替海報平安

福地娉嬛主亦佳
留賓兩度午筵開
遙遙海上潮聲起
還道催花羯鼓來

渡錢塘江無舟蒙查耕經廣文讓舟自言曾讀袁
太史稿故也感謝一律

天涯乍作通名客
江上同爲未渡身
一隻孝廉船肯讓
三更燈火話尤親
故鄉有意推前輩
當路無心據要津

他日瀛洲三島路期君還作後來人

登鑑湖快閣弔主人任處泉先生

三面雲山一閣收昔賢于此築菟裘中年解組尋丹壑
半世看花到白頭賀監高風誰得似羲之樂死又何求
我來爲踐前詩約尙恨遲來二十秋

詩見第六卷

過剡溪水急舟不能上

看山不嫌複看水不嫌曲剡溪百里中兩景皆到目鳥
篷船小沙石橫當時訪戴難爲行想見風流王子敬青
天月照烏衣明我來正值春潮起白浪滔滔打船尾纒
斷桅崩行不前一落深愁沒溪底水哉水哉聽我言人
生且住爲佳耳到海分明會有期問君何苦狂如此

將近萬壩望烟村中有瓦屋數間欣然慕之

有溪有竹有桑麻隱隱烟村濔濔花瓦屋幾間田幾畝
幾生修到那人家

嵯縣坐廟石上遇舊僕琴書

無端銀鹿遇他鄉泥首風前淚數行面目已非聲口是
身材還小髭毛蒼樓臺燕子飛雖久雞犬淮王夢未忘
知否隨園廿年事幾人無恙幾人亡

謝新昌明府蘇公名耀宣化人

未投名紙謁清塵早見廉人候水濱羈旅忽逢傾蓋客
文章曾是受知人公言讀我制藝登科留賓館借亭臺地呂氏園送
酒車生頃刻春多感賢侯似孫宰彭衙一曲証前因

新昌道中

朝出新昌邑青山便不羣春濃千樹合烟淡一村分溪
水好攔路板橋時渡雲僕夫呼不應確響亂紛紛

斑竹小住

我愛斑竹村花野得真意雖非仙人居恰是仙人地兩
山青夾天中間茅屋置佳人出浣衣隨人作平視仙禽
了無猜神魚不知避我坐支機石與談塵外事人語亂
溪聲釵光照繡翠可惜遊客心小住非久計一出白雲
中又入人間世

戲霞裳

一盞瓊漿一手扶劉郎安穩阮郎孤不知一夜桃花笑

果是天台玉女無

司馬悔橋

相傳司馬承貞被召至此而悔故名

到此方才悔念生我來橋上笑先生山人一自山居後
夢裡爲官醒尙驚

入天台路上雜詩

一灘復一灘層層洒急雨四面寂無人萬條龍作語
狹路相逢處牛多人迹稀採樵肩一撞落葉滿車飛
匱匝萬重山斷絕無行處未到不許來已到不許去
怪石當頭壓清泉與脚爭輿夫如水鳥終日踏波行

竹桴

削竹爲桴狀能行水淺深凌霄當日事浮海此時心但

有平安報從無欸乃音濟人兼涉險高節尙森森

水碓

一輪安水上雙杵動如飛雨後勢常急雲中聲漸希功
成誰索謝巧極轉忘機嘆息閨中婦年年自擣衣
天然砧杵日中鳴世事原無勉強成帆借順風春借水
也知樂得做人情

立夏日過天姥寺

正是清和節剛來天姥峯青蓮曾入夢老衲又鳴鐘覆
水竹千挺迎人雲萬重路旁雷劈樹正統四年封

雷劈樹

阿香燒劫火曾劈樹千尋立地雙株鐵擎天一樣心同

招丹鳳駕分作水龍吟日暮風聲起虺虺霹靂音

相傳前代弟兄同爭此樹一旦雷劈兩開枝幹愈

盛蓋古杉也

兄弟爭荆意未平一雷分作兩家青至今根脚燒痕在
飛過枝頭少鶴鴒

將至天台溪急嶺高勢難遽上

身坐兜籠上竹牌輿夫十步九徘徊山靈似怕詩人到
澗水橫衝萬馬來

一陂一磴一溪烟水自攔人人自前挽上陂陁三百丈
天台原本在青天

赤城有田橫廟

我遊天台山先從赤城始上山已百尋出郭才五里遠
遠渥赭明重重雉堞倚名城果不虛號赤良有以石幕
勢若吞古寺藏其裏不圖齊田橫廟食乃在此想是血
戰餘英魂作霞起

五百人墓

五百英雄骨相傳
燕此鄉韓彭雖列土
高冢在何方

一行禪師塔

仰天畫策救人死
手提七星安甕底
千年歷法一分差
身應皇唐聖人起
一朝蛻骨歸山北
五峯回環七塔幽
絕無高僧能布簪
門前溪水還西流

從國清寺到高明寺看一路山色

山徑盤何處半在山腰裏輿夫作蛇行狹處僅容置
知臨深潭一墜寧復起拚將命換山遇險那肯止行過
小石梁捨車換屐齒俄而升雲中俄而落釜底手方招
龍象足又踐屏几將斷勢仍續旣背形復倚更有欹崎
峯欲比無可擬一笑語山靈奇絕太無理

同寂明上人遊圓通洞觀唐時貝葉經硃砂鉢

高明寺裏夕陽明僧引圓通洞口行八面窻虛嵐翠湧
一龕燈照佛香清經翻貝葉西方字耳試硃砂古鉢聲
愧我前生非智者也勞七十二峯迎

過寒風關到永慶寺看牡丹

行過寒風關雙崖出霧中天常懸石柱僧各住茅蓬地

冷春常在花多色不空牡丹三月暮猶未了殘紅

素識海澄師知其在天台而入山後遍訪不得忽
于華頂遇之遂招陪遊山

西湖曾共醉斜曛一別人天信不聞每到檀林思問佛
忽來華頂竟逢君溪山路熟煩先導香火緣深怕失羣
兩局殘棋半枝燭又添公案在烟雲

海澄爲言茅蓬僧有梅谷者少年能詩往訪不值
爲訪詩僧去空山不見踪茅蓬無鎖鑰自有白雲封

履中上人年七十餘自言金陵人談予作令事甚

悉衆僧膜手環聽

居官四十年前事量料荒山老衲談倘有些些諱不得

教饒此際若爲堪

登華頂作歌

天台山勢如爭天北高欲與天齊肩到此自知高不去
擲下一朶青花蓮我來華頂峯披衣抱雲坐才覺清風
兩袖生已增白日三分大老僧拜經處下視何雄哉濃
青襯淡綠瑤草雜金苔衆山八面齊安排如坐如卧如
奔走爲獅爲象爲嬰孩雜卦傳中所罕譬鄉嬛記內所
難該一一眼前羅列而崔巍星辰恍從頭上墜海水飛
從脚底來可以吞九點走八垓邀嬉逢島鞭驅雲雷倘
乘紙鳶竟飛去何由知我非仙才可惜烟濛濛空將老
眼揩疑是仙人故意遮步障不許望見扶桑以外金銀

臺玉色兩重泉相傳出龍爪人疑山頂高如何不枯槁
我道高處有淵泉如人頭上有懺腦想見仙人羽化時
渴飲金漿不知老山僧留我宿上方五更看湧金輪光
我意殊難留將欲往石梁但說此來一大願僧其聽之
毋笑狂安得放倒天台四萬八千丈喚取縫人刀尺細
細空中量

從華頂左折而下至上方巖雨行十五里爲雲所
遮一無所見

濃雲片片雨漫漫一路間灘不見灘十萬烟鬟齊掩面
不容騷客盡情看

且向雲中笑口開莫將缺陷惱天台世間儘有青盲客

已見還如不見來

到石梁觀瀑布

天風蕭蕭衣裳飄人聲漸小灘聲驕知是天台古石橋
一龍獨跨山之凹高聳脊背橫伸腰其下嵌空走恐濤
濤水來從華頂遙分爲左右瀑布條到此收束羣流交
五疊六疊勢益高一落千丈聲怒號如旗如布如狂蛟
非雷非電非笙炮銀河飛落青松梢素車白馬雲中跑
勢急欲下石阻撓回瀾怒立猛欲跳逢逢布鼓雷門敲
水犀軍向旱蘭鑿三千組練揮銀刀四山崖壁齊動搖
偉哉銅殿造前朝五百羅漢如相招我本錢唐兒弄潮
到此使人意也消心花怒開神理超高枕龍背持其尻

上視下視行過遭其奈冷冷雨濺袍天風吹人立不牢
北宮雖勇目已逃恍如子在齊聞韶不圖爲樂如斯妙
叶得坐一刻勝千朝安得將身化巨鰲看他萬古長滔
滔

僧引石梁水爲池瀹湯勸浴

欲洗人間十丈塵老僧賜我一池春分明認得藍橋水
浴罷桃花尙滿身

次日再往觀瀑

名山從古如名士名不虛傳是石梁我最曠觀偏有戀
爲他三日宿空桑

平生不說維摩法此處爲僧恰不辭解得淵明叅悟語

分明此水是吾師

北踰小嶺路徑絕矣踏澗石而行至洞壺滴漏處
巨石如壺形浪從壺口湧聲若春行雷勢如底脫桶難
教司宮斟只可巨鑊捧可惜來路絕一望但籠從我踏
亂石行踈踈復從從扶危支兩筇尋隙納雙踵初覺腰
脚怯繼且腸胃悚畢竟窮其源張鸞真鑒空恍然印萬
川豈徒曉一孔寄語同來人但往慎毋恐縱使遊傷廉
未必死傷勇

桃源路尤險霞裳有難色余勇進至會仙石遇雨
而返

桃源無路行行者孰敢先我獨勇從之垂老性命賤初

小倉山房 卷二十八 三
階方寸崖再淩干仞澗踏石石欲動跨水水復濺五步
一峯轉十步一峯變重重天塹形幅幅屏風面神光果
離合青紅遞隱現神女示人難不肯輕相見喜到會仙
石洞門開一綫其奈山靈慳飛雨急如箭衣濕身難禁
峯壓目屢眩既無胡麻餐空有冷雲飈只好沿溪歸殘
桃拾一片

題會仙石四首

果然仙近世途遙石作樓梯樹作橋想見翠屏遮隔處
風鬟霧鬋有人招

古蹟荒唐怕討論事關兒女易銷魂會仙石上千年草
仔細摩挲認坐痕

才聽雙鬟合巹歌。又招漁父泛烟波。桃花慣作迷人事，
引入仙家總是他。

作壻山中僅半年。人間滄海變桑田。教儂不敢多時立，
生恐歸來也惘然。

惆悵溪六首

一角清溪兩岸春。溪聲以外卽紅塵。送郎到此怕歸去，
重見桃花不見人。

人天作別淚滂沱。山自青青水自波。作到神仙尙惆悵，
神仙以下更如何。

仙郎回首合歡床。應悔匆匆遽束裝。滿目山河人世換，
輸他衣錦客還鄉。

風吹石洞幾回開
玉几金牀長綠苔
如此人間殊不惡
雙雙何不渡溪來

老住山中萬事休
歸期少算亦千秋
幸虧不遇神仙好
倘遇神仙我欲愁

一動凡心二女知
故鄉未免夢依依
勸君想作仙家壻
先要思量歸不歸

水珠簾

水性如人性緩急不全科
急者爲奔浪緩者爲盤渦
我到斷橋西有泉下岩阿
惜惜憂水瑟飄飄穿龍梭
灑灑撒飛麵輕輕捲薄羅
叱之如可斷招之若愈多
峭壁爲所掩重簾遮
石婆蘿花爲所迷明珠拋
嫦娥安得返潮

笛來唱回波歌

萬年寺題壁

一庵行到一鐘鳴五百袈裟樹下迎
入簋例供香積飯
三更風送木魚聲僧墻字滿詩人少
雲霧茶濃水味清
老我江淹無采筆不能蕭寺盡題名

雨筇歌

上山索人扶將身落人手我陷彼不知彼墜我反狂
不如持雨筇勝添雨足走卜卦類得朋並耕如獲耦
前支後更撐左失右還有夾輔類周召相推似韓柳
樂書解曳柴子賤免掣肘十指盡策勲雙趺愈抖擻
平生愛看山一笑心語口業已如狼貪何妨作狗苟
能步固爲奇

似爬亦未醜喚作雙弟兄唯唯復否否

土人呼杖曰親兄弟

山行

山行不覺笑啞啞愛好真無貴賤差試看輿夫身喘汗滿頭猶挿杜鵑花

寄懷陳葯洲觀察

幾行瑤札下茅茨未到天台先索詩分俸恩深非夢想渡江膽壯有山知投林鳥作閒來往行脚僧逢大布施路過桃花千尺水龍門回首倍相思

桃源行

有序

古人咏武陵桃源者自陶淵明王摩詰至薩雁門不下十餘人各極其妙惟天台桃源歌咏闕

如予過其地爲補其詩

天台山高萬八千中有窟宅藏神仙相傳漢朝劉真阮
兩人采藥山之巔一重桃花一重水花光入水紅霞起
四顧無人忽有聲一雙玉女來烟裏吹氣如蘭前致詞
道郎未到妾先知金盤共進胡麻飯瓊漿分我合巹詩
誰作姨夫誰作嫂鴛牒開看都了了但覺山中日漸長
不知世上人能老仙鄉住久憶人間想把紅塵換白雲
奈他一點凡心動便把人天兩界分再四留郎郎不肯
送郎直到青山頂嘶斷風中班馬聲回頭還見娉婷影
還鄉重叩舊柴扉豈料滄桑事事非半年夫壻分明記
七世兒孫認識稀兩人相對情於邑懊悔當初輕作別

一段仙緣世莫知且邀隣里從容說尋仙從此走天涯
萬古茫茫白日斜不知終竟團圓否桃樹無言但作花

瓊臺

斬斬萬重崖中心起一臺自從明月照曾見幾人來地
底千溪響天邊雙闕開怪他王季重舉此冠天台

季重
臺爲天台
第一景

每至一寺羣僧出迎必撞鐘鼓請余禮佛余口號
二十字書扇曉之

逢僧我必揖見佛我不拜拜佛佛無知揖僧僧現在
到桐柏宮觀伯夷叔齊石像

雙雕石像古蹟頗傳說宣和建此祠門外清流千百曲

庭前孤竹兩三枝也知讓國全無怨未必登山果有詩
薄獻蘋蘩公莫笑料應記得采薇時

三井坑望瀑

行過桐栢嶺乃至三井坑遠望千丈瀑如天上建瓴倣
拂石梁水一樣銀河傾如何說者少孤掌獨自鳴此理
恰易知爲其少人行卽之不可得稱之無從名我亦但
望影未能遠聞聲始知古名流終當近人情

齊次風宗伯昆季周南世南年俱八九十矣招余
小敘出宗伯全集屬爲刪定

龐眉三兩叟招飲一家春爲付千秋業來求後死人文
章朋輩少患難弟兄親且當華林畧傳抄夜達晨

將出天台留別杭州故人孫學田時就館清溪

交情老去倍纏綿况復交情五十年千里遊山逢舊雨
一燈如夢感華顛難忘竹馬同騎日且補雲龍未了緣
極目青溪茅店月故人又隔幾重天

留別天台令鍾醴泉明府

劉盧家世本天親

余與君有戚誼

愧把猪肝累使君肯送幽人

登華頂勝扶寒士到青雲南衙攜手看嘉樹北郭張燈

說異聞似此深情那能忘仙山回首又離羣

天台署中有桂叅天

榻書可對二字天啟四年陳命衆題公每晚必來寓說奇事數則

出天台城十餘里齊公子梁典史許廣文海澄梅

谷兩僧溪邊送別余爲黯然

名山業已心難別况復諸公送不休
七十年華千里路勸儂還要再來遊

渠高仙尉真君許子弟通家記姓齊
更有苦吟僧兩個袈裟拖雨立橋西

桃花流水響潺潺送我登山又出山
一樣千秋劉阮恨此身依舊落人間

驪歌何苦唱千回從古浮萍聚卽開
只有青蓮天姥夢吟魂夜夜曾飛來

臨海都司江君余宰江寧時所識拔士也聞余到
執弟子禮甚恭

江名光國

昔日張童子今爲狄武襄非君心念舊老我事全忘聚

櫟護行李張燈宴射堂裴翁懽喜甚韓白在門牆

到台州寓詩人張雨村家雨村雖外出而諸郎款

接甚殷留詩寄謝

我遊天台山忘攜天台志賴得先生詩一一如指示詩
筆既工絕名山無遁形感此導師意攬勝有餘情豈徒
吟佳什兼且登華室主人雖離家我往竟三日迎門五
公子森森蘭茁芽把袂心殷勤愛客如阿爺苦心覓珍
怪雖雉來山梁烝之學彭鏗日飲三百觴仙都難久居
出門心繾綣回首望白雲人與山俱遠朋友重先施瓊
投愧報遲且留短歌行以當長相思

緯夫行

天上風西來，絳夫面東向。有意逆天行，步步與風抗。牽
曳非紙鳶，參差同雁行。首下尻益高，肩歎背可相。小住
繩掠波，急奔船起浪。有時兩竿爭，軍法交綏讓。有時一
橋礙弓絃，卸復上星見。身未息雨行，樹敢傍嘆息。勞者
心，此是人生樣。爲誰作馬牛，終朝僕僕狀。全病合相憐，
飢寒代體諒。急須顧山錢，披蓑勝挾纊。又恐半途逸，呼
奴作周防。過驛乃踐更，得替慰所望。交綵如交印，選夫
如選將。且喜若輩慣，儻走無恙匪。徒沙飯烝兼帶山，
歌唱日行五百里。中無麥鐵杖，個個楊將軍。長繩曳三
丈。

同華公子因培茂咫登山

雙峯雙塔壓城斜登塔城中見萬家高樹帶雲青出屋
荒江衝石爛成沙春聲撩耳鳥啼樹紅雨滿身僧折花
預祝多才兩公子早凌仙嶠躡飛霞

黃雲門侍郎畫雲門山作自已小像其子台州太守
守屬余爲贊

太守名符綵

周有嵩嶽實生甫中魯有具敖實名二君地之名山天
之偉人是一是二非果非因奕奕黃公生而英絕厥先
中丞山左持節迎詔雲門石麟始降仙果遲生權動
里巷惟其喜之遂以字之寄名檀林兼以志之俄登南
宮俄入霜臺轉漕入州列位三台每聞生處心也懷只
王事羈身未由來只亡何小謫視學此邦重來福地重

禮空王懸弧樹在摩頂人亡睠焉顧之黯然神傷乃召
畫工命圖山狀雲洞天門松石蕭曠笑顧兒曹此卽我
像自題數行一空色相果然委化竟在此間神騎箕尾
魄作峯巒從雲門來從雲門去去是大還來爲小住我
聞在昔逝者如斯武當山折文公留之月餘東望鄴侯
西歸歸也有期生也有時然耶否耶公知山知

黃岩道中

十里黃岩路蕭蕭雨似麻老牛知讓路新蝶學穿花雲
動山疑活溪奔石欲斜黃昏行李濕惆悵宿僧家

黃岩阻雨居停潘秀才拉遊城外委羽山

道書第二洞云是委羽山及予冒雨往其小如彈丸朱

子曾讀書地或以人傳道人獻丹石狀若骰子然鐵色
精且堅足抵青琅玕想見井公博鑑琤鳴金盤我將攜
此具招同玉女看

拗嶺

僕夫侵晨興縛屨來相告今朝路大難厥嶺名曰拗果
然一里餘踈踈半日到左轉右更回上銳下復峭非螺
旋磨盤類蝸升堂與周旋似足恭曲折恍迷道始厭繼
亦欣初快後乃笑遊山如讀書久歷始知妙又如初交
朋豈可遽違教我雖慚荆公人地兩相肖姑且師昌黎
少安幸毋躁

老去

老去遊踪怕暫忘，紀行連日有詩章。
溪清沙石都堪數，雨歇林花暗送香。
童去鳥懷牛背穩，車停人坐樹陰涼。
關心欲問誰家墓，翁仲無言卧夕陽。

一寺在萬山門處晚間獨步

四面青山繞作城，簷前雨滴殿中晴。
細看不識來時路，轉問僧從何處迎。

將入樂清境，副戎白公率文武官遠迎郊外，補中

出詩扇是余丁丑年所題，強留署中，遣將校送

遊雁山臨別贈詩 公名璉

千里車遊雁蕩春，一城冠蓋遠迎賓。
但驚勝地逢賢主，豈料將軍是故人。
二品尊官章服換，三秋離緒鬢霜新。

多情強我南衙住自掃陳蕃榻上塵

藏來詩扇寫銀鈎彈指韶光廿四秋烟墨幾行人盡逝
謂弱上李晨星一個我還遊尊前作合皆天意世上難
逢是白頭知否倉山猿鶴意望公開府到昇州

贈郭道士

白鬚道人八尺長風吹一房藥草香自言年齒不記得
但見東海曾栽桑生長西涼少習武青海從軍力如虎
年公麾下岳公門首領三軍掌旗鼓常爲周訪兩甄鳴
好作甘寧雙戟舞眼看韓彭不善終一朝心事付空空
磨將寶劍光如雪斬斷塵緣萬萬重西走崆峒北少室
飲罷金漿煉金魄朝傳元女九天符暮踏漢皇五車

騎將白鹿欲尋誰探得黃精還贈客手持蠶眠細字書
托我遠寄孫太初譚草觀青泥不封丹篆露鍾離意
何粗疎意欲相招授大道我但不言惟有笑雲在青天
鵝在山世間萬事從吾好君不見楚狂接輿趨而過啓
期負手行且歌我今樂矣遑知他神仙其奈達人何

夫容嶺

行過夫容嶺峯峯聳碧霄海鮮爭入市山頂盡栽苗草
色如新柳溪聲學小潮礮臺雖遠列聖世久烟消

望海

一望水天空方知海不同分來中國好洗出太陽紅地
少難尋岸龍多易起風人間宦途客都泊此當中

宿虹橋倪姓家其西席張孝廉請見色甚倨見余
意不屬乃夸其先人元彪公最知名曾與袁子
才商寶意兩先生交好余問君曾見袁某乎曰
袁在年將大耋安可見耶余告以某在斯乃愕
然下拜

相見爭夸大父行公然當面與韓康姓名借與人間用
惹得狂夫老更狂

過四十九盤嶺裁到雁山

四十九盤嶺盤盤欲上天不教雙足苦難到萬峯顛踏
處全無土喧聲但有泉三休才得過衣帽盡雲烟
嶺中有名馬鞍者尤險絕唐以前尚未繫開

千峯如龍蹲當中橫一馬想從洪荒開實爲攔路者何
時鑿成鞍跨鞍才得下下止山如潮萬派爭一瀉立向
天外多在人意中寡我欲吟成詩可盡不可寫嘆息千
萬年混沌鑿方且

到淨名寺望觀音髻半爲雲掩久之始露全峯
山雲如炊烟初起白一片未幾百道飛青山頭不見觀
音幸慈悲遣風徐吹開捲開九華帳露出雙鬟來

晚宿寺中同霞裳步鐵城障認一綫天

遊山惜寸陰得暇卽尋詩步入鐵障城城高天漸小打
頭洒珠璣濕我縑單衣似雨恰非雨濛濛山溜飛諸洞
空中懸道是猿猴宅頗有高人風呼之不肯出踏濕兩

芒鞋流連那肯回一綫天未過一綫月又來

觀大龍湫作歌

龍湫山高勢絕天一條瀑走兜羅綿五丈以上尙是水
十丈以下全爲烟况復百丈至千丈水雲烟霧難分焉
初疑天孫工織素雷梭拋擲銀河邊繼疑玉龍耕田倦
九天咳唾唇流涎誰知乃是風水相搖蕩波回瀾卷水
綃聯分明合并忽迸散業已墜下還遷延有時軟舞工
作態如讓如慢如盤旋有時目光來照耀非青非紅五
色宣夜明簾獻九公主諸天花散維摩肩玉塵萬斛橘
叟賭明珠九曲桑女穿到此都難作比擬讓 he 獨占宇
宙奇觀偏更怪人立百步外忽然滿面噴寒泉及至過

近龍湫側轉復髮燥神悠然直是山靈有意作游戲敎
我亦復無處窮真詮天台之瀑何狂顛雁山之瀑何蟬
嫣石門之瀑何喧闐龍湫之瀑何靜妍化工事事無複
筆一瀑布耳形萬千要知地位孤高依傍少水亦變化
如飛仙

風洞

地立千尋石天藏一洞風吹時分冷煖起處辨西東傾
耳如聞響扶雲直到空笑僂搖羽扇也會顯神通

淨名寺西北石竊千尋中裂縫處有石如龍腹正
補其罅垂鼻滴水兩孔一塞一通土人以盆承
之號龍鼻水

是誰鑿石作龍宮無梁高殿懸虛空老龍躩踞病吹雲
一鼻孔水流淙淙昔者便了奴鼻涕一尺長更有永安
王替兄拭鼻遭愆殃此獨一通復一塞得毋有意分陰
陽我欲借居作廣廈日日清泉掬兩把更請當年孔甲
來橫穿龍鼻如牽馬

至靈峯洞腰輿不能行乃拄杖步上暗數石坡得
三百七十有七

遠望靈峯洞斜狹不甚寬及其拾級上儼若登天然一
龕高朗同明堂排筵可容百客觴演圖不勞公玉帶着
翅已到浮金房石作穹廬四面合萬古不愁天欲壓一
僧念佛諸佛應片石敲崖千石答相傳劉允升入洞就

仙去二女從之行飛昇在此處陳迹荒唐且莫尋眼前
我亦無歸心將行已起復又坐那知門外斜陽沉未來
覺我衰已來覺我少細數山坡三百七十有七層公然
兩腳猶能到

每見絕壁之上有長方石門如數十間屋舍鳥或
能飛人不能至

神仙不是閉門居精舍分明敞太虛只恨張華飛不上
嫦娥無處覓奇書

天柱峯

一柱擎天起千峯勢莫千分明玉皇意當作大臣看
老僧岩

小雅山房 卷二十八 七
遠望石頭陀近觀復不像始知彼法空終須離色相

望天貓

仙鼠飛上天此貓心不許意欲往擒之望天如作語

美人石

石婦元經著雲鬟此處斜春風嫌寂寞吹與滿頭花

展旗峯

黃帝擒蚩尤旌旗不復收化爲石步障幅幅生清秋

剪刀峯

遠望雙峯截紫霓尖叉稜角有高低倘非山裏藏刀尺
那得秋雲片片齊

玉女峯

風中梳裴霧中藏雨是濃粧月淡粧莫道玉人長不老
秋來也有髣邊霜

聽詩叟

底事聽詩聽不清此翁耳學欠分明擬攜謝朓驚人句
來向青天誦數聲

卓筆峯

孤峯卓立久離塵四面風雲自有神絕地通天一枝筆
請看依傍是何人

幅幅雲藍滿太虛于今不是結繩初如何大好揮毫處
天上神仙不著書

謝樂清張荊岩明府

東甌久著邑侯賢海角相逢意洒然宦味兩年龍鼻水
琴聲幾度雁湖天我慚靈運呼山賊君本張筠是地仙
爲辦行裝爲蠟屐征夫省費草鞋錢

寄懷淨慈寺佛商上人

我本柴桑民攢眉白社避欣逢惠遠師招我遊初地門
外閃湖光風中過花氣浴以般若湯餐以伊蒲味依依
愛才心了了見佛義更復膜手言乞詩爲布施我時初
傾衿未敢遽言志別後遊天台茅蓬百有四與之作元
言如師竟無二不覺歡喜生深心托遐契急寫雲藍箋
當作袈裟寄來時佛不叅去後師言記敬佛不如師師
其知我意

館頭呼羅鳥船渡江至永嘉河最狹穿過數十人

家屋下乃至郡城

十里人家盡跨河疎花密石傍離多柴門頗有朱門意
要客低頭屋下過

過謝客岩有懷康樂公

一夢傳千古詩人重友于池塘應在此春草綠如初水
色芙蓉嫩苔痕屐齒疎相傳崖上篆猶是謝公書

瞻康樂公像

清癯古貌寫丹青彷彿吟詩尙有聲此日長鬚難布施
免教公主鬪輸贏

荆坑道中

遠望烟墩立翠微白沙高嶺望崔巍灘奔石自排牙立
風急花如約伴飛野廟墻崩神暴露大洋山隔海依稀
甌柑仙蠟江瑤柱一路嘗新我未歸

温州坐筵詞

有序

溫俗新婚三日其家張飲設樂徧延郡中粲者
東西列坐新婦南向主人多戶任客闌入平視
不以爲嫌悅某美輒往掛酌酒某酌畢隨俠拜
荅之報爵則小往大來故非洪于量者亦無敢
先焉相傳不如是則其家氏系不繁故非姝麗
不延延亦不肯來也余久聞此說疑是謠語四
月十九日到永嘉二十日王氏新婚二十二日

晚坐筵余往觀信然遂命霞裳引例成禮歸作
坐筵詞六章補古竹枝所未有

一家女兒迎新郎千家女兒對鏡光明朝坐筵誰去得
大家采伴同商量

坐中珠翠兩行排扶出新人冉冉來好似百花齊吐艷
護他一朶牡丹開

笙歌迢遞出雲端洞啟重門到夜闌不是月宮無界限
嫦娥原許萬人看

銀光燈影兩相交就裏瑤臺孰最高徑上前歌將進酒
不嫌生客太粗豪

侍兒分付紀離容斟與佳賓琥珀紅纖手自擎三俠拜

禮成都在不言中

三星光小漏聲遲會罷龍華有所思笑學孝侯風土記
爲編東越坐筵詞

偕高苕發俞運昌兩秀才登永嘉華蓋山

相傳容成子飛升在華蓋于今四千年仙迹宛然在
蒙泉水一泓清絕味可愛當門松五粒古極形多怪走登
大觀亭始信東甌大青青萬畝田縱橫如畫卦濛濛幾
片雲山腰橫作帶目未周八瀛心已窮兩戒取海來胸
中將身放天外

江心寺

孤嶼江心起亭臺巖巖骨分將雙寶塔合作小金焦下

去沙灘雁興衰早晚潮傷心文信國曾把國殤招

搖動岩

兩石相倚眠隆隆萬鈞重十手推不搖一足蹴乃動其
事實可駭其理不可求莫怪李青蓮踢翻鸚鵡洲

雲溪

雲氣弄山峯峯峯如交戰化作溪水流草鞋踏不斷

姑婦峯

石婦見石婆偃僂體自肅莫遣飛鳥來聲聲喚姑惡

石織藤盤妓甚姝而蠻語難辨戲贈一詩

明眸皓齒好身材可惜堯離語要猜安得巫山置重譯
替儂通夢到陽臺

坐永嘉花船渡溫溪

溫溪之水淺且清舟人棄槳持篙撐風急水衝撐不上
入水扶舟人踏浪水中生山來阻舟一溪分作雙溪流
推開篷牕清見底坐聽篙聲打石子

溫溪一名惡溪

人嫌溪惡客難過我道溪忙且讓他萬疊雲峯千尺瀑
江南無此好烟波

觀瀑布問謁劉青田先生像

遠望一條白高空落翠微甘霖真嶽降匹練作龍飛遺
像瞻司馬隆中想布衣傷心山下水能出不能歸

偕朱友仁山謝錫新之同登白雲山望處川

高絕白雲嶺登臨忘世間一州如斗大四面總山環竹
映碧波綠僧如野鳥閒羨他張仲蔚到此閉禪關常州張秀才良緣在此披剃

南明寺

小憇南明寺雙池荷葉香山深雲色古瀑細水聲長試
大圍樟樹渡口古樟七人合抱夸強走石梁數行元祐字磨滅剩

偏旁

輿夫嘆

輿夫負重行上山復下谷歷盡諸險艱垂暮方息足我
意獲弛擔自當速睡熟誰知重張燈徹夜作捕博此間
彼復嗔甲逃乙更逐所得幾何錢未足供饘粥胡乃大

鴟張拋撒如星落明朝重聳肩勇氣勝賁育至夜又復
然如有鬼捉縛毋乃臬與盧竟是醫勞藥物性果不齊
熊魚各有欲上智與下愚不可常理度且勿憂人憂姑
且樂吾樂

至却金館霞裳悅金鳳爲留一宿

蝴蝶愛花香花愛蝴蝶小底事不吹開春風也道好
元珪大師言萬事莫爲已成就野処央諸天色懽喜

山行雜咏

十里崎嶇半里平一峯才送一峯迎青山似繭將人裹
不信前頭有路行

風吹梅雨作輕寒穿被油衣濕未乾一霎車中小眠

好山已過不曾看

春田瀼瀼水平堤田父秧針手自攜難得插來隨意好
不同春草有高低

晴山高聳雨山沉起愛天晴遊愛陰一種淡青濃綠處
王維能畫不能吟

前峯遠望勢崑嶠及到行來客忘勞只爲白雲吹不散
青天未覺比山高

海角山尖盡插禾衝人處處小牛過開元戶冊何須看
已慶升平歲月多

客懷

作客如雲耳逢山卽是家見碑先下馬試水屢烹茶綠

笋烘干挺黃精載一車聞香不相識多少野田花
白髮人問久青雲蓋易傾虛心無物我到處有逢迎村
叟求詩扇僧箋乞姓名雪泥鴻爪迹吾亦紀生平
暫作蘧廬住何嫌客舍低寺遙先認塔村近早聞雞暖
借黃綿襖涼乘綠耳梯客懷吾正好不許子規啼
妙理閒中得清談孰與聽松稀難起翠山遠自然青有
樹風才轉無僧佛不靈眼前能指點卽是度人經
作達全無夢還家忽有思出門梅落後歸路麥黃時遊
伴憐禽子書聲憶衲師不知門外竹新長幾干枝

看山有得作詩示霞裳

青山若弟兄此間相黨附恰又恥雷同各自有家數或

以殷弱分或以瑣碎布低者卑侍尊高者頭屢顧隱者
意深藏豪者勢顯露間或生奇峯當空一幟樹總是氣
脉聯安排有法度從無雜亂皴貽譏化工誤所以仁者
心深契非浮慕寄語詩文家于此當有悟

贈縉雲虞啟蜀秀才四首

有序

過縉雲思遊仙都峯值邑令陸公外出余亦意
闌行三十五里至黃碧塘將宿店矣望前村瓦
屋畢如隨緩步焉主人虞姓者未觀名紙遽迎
入茗飲與語不甚了還寓將弛衣眠聞戶外人
聲嗷嗷詢之則虞姓兄弟齊來問先生可卽袁
太史乎曰是也乃手燭照拜且詫曰吾輩都讀

太史文以爲國初人今年僅花甲是古人復生
矣豈容遽去于是少者解帳長者捲席諸奴肩
行李相與昇至其家供張甚具余亦不能拒也
次日騎馬陪遊仙都峯心感其意留贈四詩

縉雲梅雨散輕塵旅店逢春不是春忽把名山來贈客
仙都接引有仙人

門前高樹萬千行壁上瑤琴三兩張主人我拉當年劉
子驥公然兩夜作漁郎

聞名當作古人訛道我年將百歲過自笑陽休雖健在
相逢却也髭霜多

永興家世舊知名家住仙鄉夢亦清曉起聞鷄儂起無

隔花先有讀書聲

仙都峯有鼎湖响岩掛榜崖諸色目

仙都名久傳未到頭已仰可惜鼎湖高可望不可上旁
列石笋形挺立相倚兩風吹山似來雲動山如往山洞
疑藏人人語輒應響伊誰考羣仙森立長名榜奇哉我
此來迥出人意想雖有賢主人不過亦恐倘可見宇宙
間萬事總非強人當遊某山山當受某賞一總是前緣
久已定無爽

端陽在蘭溪令梁公署中觀劇

名文永
廣東人

爲是端陽節嘉賓醉滿衙主人方奏樂客子正停車遊
罷江山冷來看歌舞華真如人世上還俗一僧家

在台州遇曹廣文君弼金華遇翟廣文灝俱別四
十四年矣喜賦一章不必相寄

我是遊山非訪舊舊人都共好山來想因緣法兼三世
還要今生見一回曹植忘機能入道君弼善攝生翟璜弁雅
最多才翟著爾雅補靈光殿上晨星聚不負尊前酒百杯

桐江作

桐江春水綠如油兩岸青山送客舟明秀漸多奇險少
分明山色近杭州

蘭溪西下水縈回分付船窗面面開緊記心頭須早起
明朝無數好山來

七里瀧邊水竹虛烟村約畧有人居鷺鷥到此都清絕

不去徇魚看釣魚

久別天台路已迷眼前尙覺白雲低詩人用筆求通峭
何不看山到浙西

重登釣臺

瓊臺登罷釣臺登白髮重登倍有情照水貌憐非昔日
遊山事可告先生荒江小泊難忘舊聖世辭官易得名
半夜推篷向空望台星終讓客星明

再題子陵廟

記得當初過富春翩翩弱冠拜音塵而今花甲還相訪
也算先生一故人

幽幽江水半菰蘆寂寂羊裘一釣徒未必無心助文叔

巢由兩個誤狂奴

牛牢高獲俱同隱只有斯人事獨彰
惹得鄴侯還艷羨也思一枕共君王

回舟楓橋哭沙斗初布衣

有序

吳門沙維杓字斗初久擅詩名余每過楓橋家
漁洲必招過從今年二月間聞余到喜躍而來
自言老健如牛飲啖殊豪及余歸自天台而斗
初竟歿猶留題隨園雅集圖一稿存漁洲處

飄飄長鬣氣如雲滾滾詞鋒迥絕塵敢說鍾期琴獨賞
本來鮑謝筆如神卷留殘墨身先逝入到衰年健豈真
此後楓橋阿咸處酒杯重舉定沾巾

過蘭溪時或勸從彼處遊武夷不過十日可到余
因天暑急歸已而頗涼心頗悔之

蘭溪東去崇安郡只隔仙霞一嶺雲可惜炎風欺白髮
不容親叩武夷君

浙東野廟甚多賽會甚盛戲題一絕

欹斜野廟徧岩阿嘈雜神絃唱九歌消受香烟管何事
人間木偶福偏多

正月廿七日出門五月廿七日還山

爲訪名山別故山還山諸事喜平安到門細數養成竹
入戶喜逢初放蘭過眼雲縈魂尙繞扶身筇杖露初乾
挑燈急寫新詩稿多少風人要索看

永之觀察年逾七十需次京師書來戒我尋春賦
此荅之

有人不知老圖官入幽燕有人不知老看花時時顛兩
人結習無短長有如臧穀全亡羊甘蟲食蔗苦食蓼各
樂其樂休相笑

題何春巢賣花圖

千紅萬紫百花新花下何郎想嫁春記得賣花聲一喚
山塘無數捲簾人

耕田辛苦讀書窮活計年來事事空只有種花經紀好
一生程本是春風

賣花我又替花愁幾朵能簪少婦頭最是關心小湖

隨花全上別家樓

十戶中人賦莫夸珍珠一斛更豪華扣籃我欲低聲問
可有人間解語花

鮑文石四十索詩

鮑子投我書字字古人語道今年四十學業尙如許先
生賜壽言但規慎毋予璉實用志紛自忘參也魯青箱
紫宙篇寡棄多所取作畫更作書嗜今復嗜古遂致百
無成光陰棄如土我道子胡然子力方須努蜂能採百
花甘蜜胸中吐廣樂奏鈞天鐘鏞雜簫鼓博學斯能文
多錢裁善買上可造聖門一貫師尼父下亦傍禪宗廣
大作教主子腹旣注注子容亦楚楚仲宣雖體弱筆力

如牛駑長卿雖善病馳驟極元圃知非早十年伯玉且
避汝欣逢強仕初昔賢可歷數孫宏當此時春秋習訓
詁朱游當此時變節從規矩楊雄當此時作賦獻九五
左雄察孝廉四十方許舉子今真壯哉似月初升戶絳
灌可以文隨陸可以武欲作考据家魯魚兼亥虎欲極
詞章功隆平仗黻黼盡必追荆關字必媲歐褚一堞已
是城何況連百堵一槩也是船何況加八檣譬彼失晨
雞重鳴正可補高揮魯陽戈趁此日正午明年秋桂高
定斫吳剛斧久鬱氣必宣衝霄炫毛羽當今石渠彥弁
雅誰君伍君子休謙謙碩人應俛俛今夕復何夕金風
澄玉宇蓬矢洗銀河稱觴喚織女有曲徑須歌無酒速

宜酷紅藕花正香青琴涼可撫讀我祝嘏詞蹲蹲這起舞

落齒有悟

口齒三十六齧齧相依倚全在此人身稟受如一矣胡爲脫落時遲早分彼此或壯已乖離或老猶附體此是何因由問齒齒不理似非齒所知亦非口所使莫之爲而爲無從著議擬始知天於人亦如口與齒愛之不能生惡之不能死一言以蔽之萬事偶然耳

東香亭

七十人忘兩髣絲望雲時作嶺南思阿連知我心情否半爲荊花半荔支

擬從南海看扶桑先向天台試石梁四萬八千峯踏遍
看來梅嶺是康莊

幾回手札下番禺密字珍珠萬萬餘惹得衰翁揩老眼
閉門三日讀家書

海錯零星寄太多黃團紫皺小紅螺鄉隣傳玩兒童舞
爭唱韋堅得寶歌

白女韓娥色盡空一枝如意名占春風教人悟得東皇
意花是無心種始紅

明年倘到越王城不向司關道姓名徑上珠娘船上坐
萬花扶入海天行

在杭州喜晤鄧介錢竹初

我聞天台遊定向四明過中有素心人作宰彈琴坐僧
城修書先寄之道我卽至君應知一車一笠一筇杖替
我遊裝早辦治豈知萬事難料量入舟舟人作主張乘
風直過剡溪渡訪古不到曹娥江絃歌側耳花封近咫
尺無由得芳訊甘茂空傳息壤盟魏文竟失虞人信新
昌道上遣長鬚遠致微物申區區歸說賢侯真好我南
衙早置幽人居天台登罷雁山走千里烟雲落吾手奈
有胸中石闕衙不負名山負良友天公知我悔過深轉
教君向吾鄉尋歸來一笑重置酒償盡三秋離別心金
膏水碧蒙相贈五字七言俱上乘當今真有謝宣城也
解吟詩也爲政西湖堤邊泛畫舫白頭作別尤消魂他

年願化蟲沙去還作陳蕃榻上塵

六言雜詩

粉白何如雪白爐香不及花香此是人天分界不容半點商量

一樣青青松樹一般同種山巔一樹草亡木卒一枝蔽日參天

容易天生顏色無端零落殘紅安得身爲花幔替他遮雨遮風

灰灰紅泉石磴萋萋翠竹籬色生怕漁郎闖入滿山不種桃花

人影忽然在地仰看明月當天作速空中炤鏡已經沒

到雲邊

吳節婦詩

郭氏女吳門妻撫孤中夜聞烏啼談何容易孤成立東

風又折瓊瑤枝

解一上有老姑下有婦婦如影隨形熒熒

孤露忽然祝融災嚙嚙出出走無路

解二孺人聳肩負阿

姑阿姑頽邁驚且呼肩重如山蹠蹠趨

解三災及額燒及

裳心知有姑痛已忘姑雖免死身亦爛音聲啞啞若吞

炭

解四婦乃被髮泣涕再拜北斗旁願活我姑賜我方果

然姑夢若有神焉吹以清風飲以甘泉一朝病已壽考

遐年

解五于今姑婦都已令終長孫入泮家風隆隆似此

姬姜我聞亦寡敬作歌詩俟采風者

解六

贈花詞爲嚴子進作

錦瑟年來漸漸長
嫁春時節費商量
爲尋燕子安身處
送與盧家白玉堂

兩載黃門夢雨清
一朝重起看花情
小星也有修來福
不用當頭避月明

子進悼亡兩次

分付雲鬟侍寢餘
燒蘭劈錦靜相於
粧奩替買芸香去
公子平生愛讀書

金風涼動易成眠
薄薄如衾未放綿
記取中秋好時節
桂輪才滿第三天

贈彈詞盲女王三

妙絕摩登女生來
色卽空無人蒙一顧
有曲唱三終月

好雲常掩花嬌睡更紅暗中休摸索我是白頭翁

葠

愛作名理談厭聞道學氣所貫紫團葠作藥無藥味

題冬心先生像

彼禿者翁飛來淨域怪類焦先隱同梅福嗜古得其三
昧觀書能窮八錄畫之妙可以上寫天尊詩之清可以
聲裂孤竹然而觴耦不作嶽嶠歷落好雄惡雌污羣潔
獨忽共鷄談忽歌狗曲或養靈龜或籠蟋蟀揮甘始之
金餐李預之玉識齊桓公之尊畜童汪錡之僕梁鴻畢
竟無家叔夜終于忤俗一旦化去公歸不復誰把生金
鑄他芳躅有弟子兮兩峯洗手天河描成此幅充充古

貌襜褕奇服其志惇惇其神翬翬手貝葉經似讀非讀
曳鞵鞞履欲縛不縛鬚連蜷以離披目眴眴而凝矚賈
逵之衣圭齋肩張融之革帶至髻點三毫而輔頰宛然
取側影而精神愈足觀者無小無大皆喟曰此冬心先
生之真面目于是妬者笑思者哭慕者仰拜者伏懸諸
中堂而一酌一杯當作佛像而三熏三沐雖然吾不羨
夫死後之孫叔敖而獨賢乎紙上招魂之楚宋玉

稽受之侍講幼時受業今侍直 上書房假歸過

訪留詩見贈賦此荅之

身列青雲最上層忽來山裡訪先生高冠無復垂髻影
低語依然問字聲疏牖一家師傅重韋賢兩代相門清

花箋粉壁題詩去四十年前弟子情

去夏六月兩峯觀察過隨園將阿遲寄膝下去今年從湖北作書來賜名文瀾俾與諸公子爲輩行寵以袍鎖等物寄詩三章依數奉答

瀟湘雲水正相思忽有新詩寄阿遲記得去年當此日藕花風裡喚爺時

錦袍文葆遠相將金鎖遙分玉雪光知道身材兒易長爲他濶幅作裁量

文瀾兩字比諸昆稚子能知假父恩時把嘉名夸阿母兒今一品令公孫

哭朱竹君學士

古人今不作古道竟非宜聽說文星墜空增吾黨悲持
身盧子幹好客鄭當時奇字三蒼纂窮經六籍披請開
書四庫聞上開四庫館奏始于公漸白髭千絲學博天能鑒心清
水共知龍門今逝矣寒士欲何之大雅扶輪者長安剩
有誰

玉尺持江左旌旗過小園僞謙稱後輩把酒坐黃昏佳
士交相薦名山喜共論依依水精域戀戀菊花村豈料
裁分手俄成永斷魂年華輸我老官爵望公尊有集應
傳世無人忍忘恩遙知絳帷客淒絕老魚門謂戴園太史

哭童二樹有序

二樹名鉦山陰布衣工詩善畫少所服膺獨予

余推許過當春間修志揚州買舟見訪適余遊
天台不獲一見及至冬月余往訪之而君先十
口死矣

苦累先生望眼枯遲來十日渺黃墟李邕識面心何切
范式登堂夢已孤留贈梅花扶病寫待商詩集滿床鋪
九原此日吟魂在知我靈前一慟無

過詩人劉南廬墓下作

有序

南廬名名芳福建布衣詩工七律遨遊四方所
到皆羣僧供養問何不歸家笑而不答卒于通
州州人爲薤琅山路右丞墓側

衰年舊雨意難忘憑弔詩人到紫琅一樹昔曾留穉子

丁丑九日南廬小作隨園有水影到
窗知月止松風過枕覺秋深之句 九原今喜傍賓王
閒雲踪跡人難問斷碣欹斜冢漸荒深夜鮑家詩再唱
天風海水應宮商

聽朱夫人彈琴 有序

朱沛三觀察寓杭州紅藕山莊招客小集忽引
余入內夫人玉貌錦衣隨二侍者抱琴出見敘
寒暄畢起立曰妾故善琴非得先生詩不足以
張之請鼓一再行換先生佳句旋從容布指操
關雎一曲而退

意外琴聲響桓伊喚奈何驚鴻初照影纖指已生波逸
韵梁間總餘情絃外多曲終人不見天上一嫦娥

小倉山房詩集卷二十九

癸卯

錢唐袁枚子才

霞裳就婚汪氏已五朝矣芳訊杳然賦詩調之兼呈新婦

去年遠走天台路此日真攀玉洞花從古劉郎爲壻樂胡麻飯喫女兒家

八載青衿入泮池婚期太覺阮修遲隨園烏鵲爭填路助汝銀河喚渡時

入市羊車久擅名今宵燈下見卿卿佳人不語低頭喜消受檀奴過一生

杏花紅嫩柳條麤點綴粧臺入畫圖底事清明尙飛雪

想同仙子鬪肌膚

五日悄悄住洞房定知努力作鴛鴦藁砧滋味親嘗後
示我房中曲一章

關雎彈出正聲希回首桑間事事非從此倉山桃李樹
好花不逐亂風飛

繡被原該覆鄂君書來何必借殷勤只嫌山裡名香少
還倩荀郎身上熏霞裳來借錦被

戲題花葉寄粧樓好作羹湯代束修莫惱袁絲太無賴

奪人夫婿出山遊

約滿月後同遊黃山

轉眼秋風桂影高明春郎賦鬱輪袍斷機勸學何人事

應替先生一半勞

海棠下作

堆滿萬重雲西窗日漸曛海棠香自有只要靜中聞

同霞裳遊黃山過采石登太白樓

霞裳美少年絕似崔宗之攜登謫仙樓懷古有餘思春
樹尙披錦江聲學咏詩重重碑題滿繼響知爲誰惟有
蕭生畫揮毫得天倪歲久壁泥蝕我來見已遲昔人不
可作後來孰與期急沽斗酒至臨風兩手持仰呼太白
星下來飲一卮

采石東去磯上有賈似道鐫聯壁二字

千尋危石劃江開賈相當年興太佳家裏蘭亭八千匣
尙來此處作摩崖

從平溝行至三溪作

鷄唱平溝客起遲荒原漠漠草離離竹輿行過三溪口
漸漸青山來引詩

琴溪相傳是琴高騎鯉處

琴溪山若待人終朝鶴立向水濱琴溪水清可弄穿出
平橋十一洞洞中丹書不可識浪引寒烟搖石壁溪草
溪花秋復春仙人一去無消息我笑琴高子終竟非仙
才但騎鯉魚去不騎鯉魚來

榆嶺

榆嶺高難上肩輿換步行見山生足力聽水惹吟聲路
狹烟雲讓人稀鳥雀迎息勞坐巖石刻竹自題名

到新安遊雄村曹侍郎園隨同令弟顧厓太史泛舟小南海

遊園必到辟疆宅咏勝必登給事堂况復雄村十五里
水容山態相迎將主人邀我入瑞室歷盡陂陀三百級
墻外風帆入座飛林中怪石迎人掛層層水木湛清華
對景懷人意倍加不知朝裏青雲客何日歸看綠野花
難弟同遊小南海江中別有金焦在不是人間香火時
鳥聲歡動闌干外共指溪河水一條東行便是浙江潮
白頭未免鄉心動卽欲乘風上小船

何素峯居士招飲仇樹汪園座中黃甘泉巴雋堂

汪漁村等十一人各賦一詩

何遜風騷主招爲野外吟引涼高樹早聞笛老懷深美酒出金谷羣賢聚竹林新詩歸各咏漢上續題襟

余十二歲入泮卽讀吳冠山先生文今五十六年矣雄村歸後方知先生冢住溪南相離不遠缺於一面心殊眷然賦詩奉寄

文章早歲便相師垂老相逢願屢違千里名山空蠟屐兩朝前輩未撫衣溫公獨樂郊居久魯殿靈光海內稀咫尺丈人峯未上鳥飛已過倍依依

同秀才黃世瓚劉志鵬登齊雲山

登山非登舟興失多曳綵想見齊雲高飛鳥猶股戰初臨雙松橋再入桃花淵離樓灌木陰屈曲陂陀旋路斷

一洞開石裂諸天見懸崖高竊張吞覆碧池面遊人在
下行驟雨衣不濺但訝珍珠簾挂空千條線趺坐未片
時陰晴狀又變

天門有單複一重又一重我欲謁真宰二客爲先容哀
壑勢杳條怪峯形宸隆橫紉疑斧劈密縫類雲封駭駭
門列鼓礪礪厓懸鐘三姑旣已接五老重相逢開口戲
相喚應者聲滿空遙望西天門欲往未可窮且宿百子
樓正對香爐峯此峯真豪傑崛起山當中

從江村冒雨至黃山湯口

不獨晴行雨亦行江村卅里盡溪聲無心見客草冠好
有意上山行李輕榴火照人紅冉冉秧針搖水綠盈盈

夫容萬疊雲中立知是山靈抗手迎

湯泉浴

萬仞蒼厓覆浴堂早知勾漏有砂床一泓碧玉煖如許
半日熏風坐未央酌飲最憐香氣味試來難轉冷心腸
何時得上知章表乞作幽人湯沐莊

過回龍橋聽土人說起蛟事

行過回龍橋山痕破羣綠怪石何崩奔滿阬堆磴确土
人爲我言此處龍起陸一龍將升天八百蛟相逐噴雷
兼酒雨撒沙且飛雹尾學蚩尤搖頭作共工觸未免恃
龍威摧殘到草木龍視蛟如奴縱之忘束縛蛟視山如
無氣欲吞五嶽送龍入海後蛟仍返舊壑當其得志時

力可移山岳及其失勢後瑟縮泥中伏往往三冬岷伐
蛟食蛟肉感此氣化機元黃有剝復山川尙逢劫人世
眞局促勸蛟慎行藏勸龍管僚屬頑石聽余言點頭滿
山谷

一枝

一枝筇竹杖直上白雲端性命關呼吸雲山始大觀仙
禽奏音樂古栢作闌干五月端陽近重裘尙覺寒

宿慈光寺觀前明萬歷宮中賜普門和尚袈裟金

鉢

古鉢金光耀紫烟袈裟針脚尙新鮮禪師披出難消受
千個如來坐滿肩

從慈光寺步行穿石洞上木梯到文殊院

青天豈可削黃山峯如刀刀上豈可躡黃山路莫逃初
入雲巢洞再上脫凡橋一梯既升天萬嶺如湧潮趾未
納二分雲已埋半腰仗手不仗足手可攀樹梢選石如
選几一坐償百勞土人指峯名附會真堪嘲逼視頗不
肖遙睇偏相撩到寺魂小定滿胸山尚搖

一路望天都蓮花二峯半爲雲掩到院少頃始露
全峯

山如新婦羞相見故使雲爲半面粧坐待片時才却扇
天公教我捉迷藏

端陽阻雨文殊院雲來遮門一無所見午後小晴

步至立雪臺望前後海諸山

端陽開門人世換不見人形但聞喚身入元黃渾沌中
但聞雨脚聲聲滴不斷大風西南來勢若奔萬馬老僧
生怕寺飛去扛取奇峰壓屋瓦須臾雲氣重重開我乃
支筇立雪臺前海後海看崔巍許看不許看全憑雲主
張趁此雲歸家亟亟左右望可惜黃山太兩眼小萬簇
青青看不了且倚松身當床卧更折松枝把苔掃除却
雙桃獅象玉屏風只愛僵僂一峯有似老人老

章亦周秀才與山僧同迎至硃砂峯下

老僧揖我右秀才揖我左儒釋一齊迎不覺笑言瑳秀
才負高懷久斷紅塵鎖時時抱孤琴到此峯頭坐彈開

雲數重驚落花幾朶不負山外山眞乃可人可始知曠
達人世間不止我

雨後自文殊院左折而下過百步雲梯一綫天鰲
魚洞是黃山最險處

雨過灘勢急水與人爭路危磴高且滑飛鳥行難度鞋
苦聲確穿杖恐軟沙慢卻艾難裹羶堇父但懸布劍戟
下自天頭仰驚石怒小却學蚓屈徐引作蛇赴疑虛背
怯倚審固趾才措豈徒三次休兼貪四面顧安得億萬
身一峯一翔步

平生見慣天忽然一綫小且喜雙厓夾雖跌不得倒石
覆黑如夜罅露白成曉乳竇閉沉沉靈泉滴悄悄快人

松可感迷人雲可憐才爲井底蛙俄作升天鳥有意示
人難造化鬪姦巧銳進固有拒退縮亦難保不能乞山
靈放平憐我老只好息喘吐忍死往前討

鰲魚張口吞入者貌都慘我獨勇登先所恃惟一敢穿
腹乃踏背入坎復出坎遠望煉丹臺松針似鋪毯近看
蓮蕊峯幽露含苗菡因之語遊人自視慎毋欲果有猛
進功萬境無不攬何必肉飛仙虎目睨眈眈只須趙子
龍渾身都是膽

坐蒲團石間望慈光寺在萬山之中如落釜底

小坐蒲團望碧霄眼空下界察秋毫如何低極慈光寺
昨日來時只覺高

坐光明頂上老僧送茶至

風吹帽落帶繞頸履踏蒼苔濕至脛看山看到衆山無
自知身到光明頂此頂寬平容萬馬前後兩海界井井
衆嶺森羅脚底來憑我恣餐如列鼎或指九華浮遠翠
或說雙丸騰倒景或夸陵陽青百重或詫宛陵烟萬頃
我從絕險得坦途小坐片時心耿耿譬如聽過鈞天樂
雖有他樂不敢請又如强弩射潮回魯縞再穿力不猛
方學渴猊思飲海忽見老僧來送茗和雲帶露一吸乾
滿腹金莖仙露冷

上蓮花峯至半途以風大而止遣人登頂取香砂
嗅之果然作詩二首

非關足力差，實畏終風暴。莫怪青蓮花，顧我只管笑。
想因香界諸天過，咳唾隨風落作砂。我把鎖雲囊裏去，
散來人世作天花。

宿獅子林晨起登清涼臺看雲鋪海

清涼臺高迥絕倫，我登正值山鋪雲。一疋布將大地裹，
千條練許山靈分。初散後聚結作片，左缺右補團成羣。
青峯幾叢未滅頂，風行水上成奇文。誰持銅斗向空熨，
壓軟萬頃玻璃紋。疑是王家元寶鬪，國富樹樹絹掛南。
山勻又疑裴氏藍，田新開墾耕烟種草龍。殷勤王母瑤
池砌白玉，秦陵江海流水銀。葛洪傾鎔丹鼎汞，羊欣亂
書白練裙。相較都覺有痕迹，不如此處自然一氣吹氤。

氤更喜此身立雲上任他白衣蒼狗來紛紛爲我一謝
雲中君高歌此曲聞不聞

觀鋪海時甚苦太陽思有掩覆之者忽然雲生竟
得倚松而坐

人心一念動天上片雲起高雲起空中低雲起脚底高
者若張蓋遮日殊有情低者若遊戲鋪海尤分明俯首
看蜃市仰首謝碧落倘非雲上雲安得樂中樂

望天都峯不果上

天都高絕與天隣欲上頻看七尺身底事望雲頻縮足
雲中不見下來人

登始信峯

接引松觀棋散花進寶諸峯俱在此

巖若雙闕壁立青天近久聞人世傳不信今始信陡
上最艱難占卦頻得困盤旋蟻封曲出沒鵝鵝陣愁臺
身屢繞澗池翼勉齊裁到此峯前開目得一瞬危哉小
石橋跨空僅盈寸途寬尚可返勢迫惟有進賴松來引
人援手如相認

穿出石罅後別有山重重天女花盡散仙人棋未終啞
然笑富媼多峯以爲寶幸喜諸兒孫頭角都要好下有
沉沉溪望之如下天縱使身墮下得到知幾年我欲投
長繩量他深幾許又恐半空中蛟龍來攫取

到西海門看落日山中藏山頗似天台瓊臺

媼皇鍊石石無用秦王驅山山太重一齊放向西海門

稜稜萬古猶飛動門外屏風遮迥周門中武庫藏戈矛
嵌空精鐵盡壁立瓊臺突起勢未休處處惹人作危想
失脚一落誰相留自非生死度外客到此誰敢開雙眸
我胡留連不肯去來世或到今生不其奈金輪閣屋上
海未來捧山先收不得已乃下山走遲恐星辰亂打頭
從朱陵塢繞出天都蓮花二峯之背到雲谷看九

龍瀑布乘興下山

青山長住人不住着過青山人欲去但從腹背盡經過
看山才領全山趣朱陵塢下路陂陀過此陂陀平不頗
明知未到峯無數但舉知名到已多賓朋相逐色欣欣
世上人迎世上人我亦回頭隔兩塵衣裳尚帶烟霞痕

雲谷飛泉走石隙銀河倒落三千尺似怕歸途太寂寥
特遣九條龍送客關心甘苦互乘除痛定思痛樂有餘
自從足繭千山後才信乘車是大夫

土人能負客遊山者號曰海馬作歌贈之

黃山有岷真健者雲海橫行力如馬慣負遊人絕頂遊
人亦渾忘馬是假自言少小學飛猱千岩萬壑行周遭
勇可習也胆可養足所踐處無卑高老我遊山不自量
目極危崖心想上仗汝行纏縛向肩衝沙犯嶺雲爭讓
初登始信兩三峯繼極蓮花千萬丈暗中偷眼往下注
純是死生呼吸處不信飛廉果解飛且學孟捨能無懼
疑人不用用勿疑托孤寄命憑他去果然負重力能勝

個個身如着翅行有時故意作疾走萬山隨我同奔騰
地雖無土總能踏天如有階亦可升上比商丘開出入
水火無驚猜下比崑崙奴飛行絕迹何殊乎八日遊山
事已了策助那更如渠好不着黃襪肯負人並非亦免
能先鳥祇我思量轉自憐七十老翁猶襁褓

悼松

黃山之松世少伍不在高長在奇古根未離地身已曲
性似畏天頭早俯森布儼同華蓋張囀強慣從石縫吐
不階尺土真英雄接引遊人類佛祖擾龍破石誓闢名
載入詩歌譜入譜一朝人力少周防甘受樵夫斤與斧
拉雜摧燒漸漸空八九依稀存三五奇峯不見瘦蛟蟠

絕巘空餘弱草舞老僧膜拜力難救青山無言色慘阻
果爲梁棟支明堂松縱受戕心亦許其如當作腐草看
半入煤蓬炊瓦釜古來劫數總皆然萬事原非天作主
車鞭駿馬背負鹽盤烝美人頭作脯世充書卷盡沉河
阿房一炬偏遭楚可憐松亦與之同帶露含霜變灰土
我欲上表通天臺玉皇勅下羣官府栽培保護三千年
或者奇松還再補河清可俟人壽難獨對荒山淚如雨

筆花峯

危石尖如筆當尖松樹斜濃雲如潑墨開出後凋花

小心坡

險極坡難過小心各自持勸君平地上還似過坡時

音樂鳥

髣髴歸昌律簫韶奏太虛漢王眞識曲鳴鳥愛樊衡

木蓮花

雲海盪波濤一碧千萬頃蓮花認作池悞生高樹頂

捨身崖二首

捨身如捨錢但須值得耳樂哉此崖乎莽莽仙雲起安得李清繩墜我直到底再過一千年依舊我歸矣

千重烟水萬重崖絕似瑤池白玉臺多少貴人身忽捨可能捨到此崖來

紫石峯

南朝三十六英雄散作黃山處處峯獨有此公顏色異

玉皇別與紫泥封

偶成

是處庵俱到無求佛亦知月來如有約雲去不相辭旅
舍難爲飯車中易得詩歸添行李重松樹雨三枝

惱雲

山下看雲樂山上受雲苦雲氣忽然來萬目一齊瞽不
去爲霖雨徒來作渾敦黃山倘再上先置掃雲人

謝杖

艱險憑誰共孤筇最可憐握添腰脚健扶比子孫賢絕
壁風高處荒灘水急天若非君助我若個與周旋

聽水有悟

水性比人急有觸怒卽起化爲裂帛聲花花聲不止恍
讀韓蘇詩一韻直到底要知山太靜非此無聲聞古來
傳道者不傳耳聾人

茶亭

茶亭幾度息勞薪慙愧塵寰着此身輸與路旁三丈樹
蔭他多少借涼人

蠅

山頂蚊蠅盡蕭然絕點塵蒼蠅偏不斷高處有讒人

太平道上寄懷巴雋堂中翰

我遊黃山無主人黃山爲主我爲賓誰知尙有主中主
巴君軒軒更霞舉去年早欲來訪君人言君看瀟湘雲

今年無心忽相見春水可剪情難分呼童急掃陸淺屋
留我陳蕃榻上宿晨起摩松露氣清夜深說鬼燈光綠
雀籙鷄碑無不有天生兩隻摩崖手藏得蘭亭字數行
此碑不向昭陵朽誰云考据無詞章君獨兩家兼擅長
高歌七言長短句天風海水音琅琅山靈促我縛蠟屐
欲行不行留七日君更依依送出城下車握手難爲情
轉瞬丹臺遊已過漸漸九華山又大掉頭烟裏苦相思
三十六峯人一個

陵陽鎮有綽氏者族八千人云自光武時卜居至
今未會他徙余宿其家作詩贈之

建武有遺民陵陽住水濱不曾知魏晉那復羨朱陳一

姓全輸課干昆自結隣欣欣鷄黍意雲外共迎賓

九華山

九華如屏風好處都在外勢有龍門高徑無鹿角隘直
登天臺巔氣象始覺大霞標多遠矚巖景少近愛相傳
新羅王此處持法戒鳥共魚泳游虎隨僧禮拜千年委
蛻形舍利今猶在萬釘包塔縫銅繡發光怪從從走十
方到此作頂戴僧因香火富佛被禪門壞我亦三日留
了此遊山債

家春圃設醮九華僧有爭香火相毆者戲題二絕
禪門閒看白雲飛從不燒香惹是非生怕佛靈能降福
受他恩重要歸依

不求自己偏求佛佛手拈花笑不清道我至今心抱歎
未曾一粒施臺城

貴池同童伯龍公子周益三秀才泛舟齊山

兩面湖光一道堤風烟絕似聖湖西亂峯委地矮逾峭
古柳受潮高復低穿石洞行疑出世攀藤蘿上似登梯
姓名畢竟摩厓好七百年來認舊題

齊山二字包孝蕭
書岳忠武王陽明
俱有
題詠

過文選樓弔昭明太子

蕭梁宮殿久蕭條剩有書樓聳碧霄生共河間扶大雅
死隨子晉賦逍遙人間家嗣恩雖薄天上文星位不祧
聞說池陽靈最著夜深時見采旗飄

宿五溪有懷亦韋上人

遊遍千山與萬山，好山容易好僧難。
偶來蕭寺停遊屐，得見支公在講壇。
語妙直教花欲笑，詩成常被佛偷看。
與師邂逅雲堂意，雨後吹來月一丸。

寄德中師

九華三日住，頗憶德中師。
妙相生懽喜，多情惱別離。
登臨先引路，布施但求詩。
定有前緣在，青天明月知。

謁余忠宣公墓登大觀亭

一旅曾揮落日戈，大觀亭畔冢嵯峨。
忠臣也要江山助，岳墓西湖酒奠多。

近來

近來愛賦遠遊篇到處逢迎感宿緣楊柳身高絲到地
閒雲心冷影橫天僧庵有字先看壁石洞無茶且飲泉
兩月離家千度笑幾人如我送衰年

四月六日出門六月五日還山

家居久自嫌遠歸身忽貴妻孥迎到門顏色若有異亟
亟問平安欣欣白家事黃犬亦有情搖尾從外至稚子
各牽衣爭先兄妬弟重登讀書堂再到看花地卷軸拭
灰塵尊罍加布置分明所厭餐到口覺有味恍惚衾裯
間舊寵疑新嬖某友書尙緘某物藏還記回頭豈出夢
一笑如隔世敢云謫仙人依然復舊位自是出山雲來
去總隨意

兩接香亭家信戒我遊山賦詩答之

七十扶筇涉險忙阿連屢次戒行裝那知此老有天幸
六月在途如許涼

樂府休歌行路難江山原待達人看歸來更有心開事
竹比去年多幾竿

荆樹殘花剩兩枝弟兄白髮倍相思爲言黃海人歸矣
宦海人歸在幾時

南陵道上喜晤宣州太守孫公別後知寄有序

公諱述曾字敦夫是予已未年居僑主人也其
時公才七歲尊人牧堂太史延余權託室事余
憐弱館選俱主其家今太史久亡而敦夫亦兩
易蒼然矣第次相逢感有贈

五馬相逢路狹斜卅年前記住公家同聽學舍三更雨

看折瓊林一樹花浮世光陰真逝水故鄉親友類搏沙
不禁揩眼風前認七歲郎君髯也華

家春圃重赴皖江臬使之任六十生辰寄詩作賀
暫息鵬程兩載餘皖江重駕繡衣車舉帷正好看新綠
閱案真同理舊書雅度世推羊叔子祥刑人愛路溫舒
遙聽攔道官民語六十容顏四十如

請訓無勞到日邊 君王知道阿戎賢才高豈止官三
品 恩重行看歲九遷課子庭多書帶草司關囊少水
衡錢欣看一朵卿雲色光照鵠原薄暮天

記着袍歸娶時吾家臨汝最相思揭來黃巷尋棠棣
轉盼南鸞集鳳池上苑分飛花看早揚州同醉夜歸遲

而今相對垂垂老只覺難兄髣有絲

金陵小住賣珠廊路隔隨園七里強常以笙歌招娣姒
幾番兒女鬪羹湯添籌海屋身雖遠開府江城望正長
擬向黃山覓仙草採來添作紫霞觴

哭黃仲則

有序

仲則名景仁常州秀才工詩七古絕似太白流
落不偶年三十餘客死山西

嘆息清才一代空信來江夏喪黃童多情真个損年少
好色有誰如國風半樹佛花香易散九天仙曲韻難終
傷心珠玉三千首留與人間唱惱公

六月二十日記寒作

六月涼雲二月同今年不競是南風公然當暑成秋土
翻笑知冰是夏蟲威勢不行當令際熱腸偏在冷人中
班姬紈扇休輕棄只恐炎官事未終

品書

品畫先神韻論詩重性情蛟龍生氣盡不若鼠橫行

將詩集與人換秋蘭

許將湘草換文章兩物分明足抵當交易既成還自悔
筆花豈止九秋香

每口晨起折芭蕉花上露飲之

日飲芭蕉花露鮮採來常與雀爭先瓊漿何必千年計
一滴甘時一刻仙

再遊牛首宿叢雲樓作

叢雲樓再到久別覺心孤題壁數行在前僧一個無
山皆故物白髮是新吾記得當年住藤床對雪鋪
豈料風塵客今爲桑苧翁卅年多少事一笑海天空樹
影雲梯石鈴聲寶塔風忍寒還試健閒步月明中

牛首廟門外古銀杏歌

老樹高不休雷怒焚其首樹死心不甘孫枝從旁走一
枝入地復出地三伏三升重起勢遠看屹立有千層近
察孤根只一氣渴兒赴海尚回頭乖龍掣雲忽掉臂不
知此樹生何年劫灰陣陣飛眼前大椿春秋何足算疑
與盤古同開天我遊名山大川徧似此奇觀竟未見

知老矣才無多爲汝奇賞還作歌

題俞企延先生遺像有序

先生名時篤字企延國初隱士入錢唐縣志
方伎傳其五代孫蒼石就館江寧以遺像索題
卷中畫者國初名手謝文侯題詩者周亮工
吳山濤兩公而已

武林有耆舊槃槃抱逸才生當易代時肥遯甘蒿萊借
畫表天倪吟詩舒幽懷心淡名雖忘道成藝自佳一時
求請者珍重比璵璣偶然寫遺像白眼青天開戍削菱
荷衣飄蕭麻葛鞋打頭響松子拂袖飛松釵是誰堪作
伴除非巢由來

文孫蒼石子箕裘傳五代詩學有淵源都宗少陵派與
我遇金陵相知成近邇欽欽授此圖矜寵母乃太道得
君子言庶幾先人愛卷中周與吳前輩兩賢在此後百
餘年題者竟不再想見鄭重心琳琅如有待顧我獨何
人而敢破此戒捧筆不敢辭落墨不敢快諾已書數行
熏香還再拜

琴姑于歸浦口作詩送之卽索婿和

秋風八月館甥忙殘臘雙雙又束裝底事秦樓留不住
合歡堂上有尊章

崔廬何必說榮華就此天姻儘足夸四十五年同榜客

一齊頭白喚親家

崔林刺史
戊午同年

綠淨町中花滿枝蔚藍天外雨晴時
檀郎愛對青山坐
不是攤書便畫眉

旁和妯娌上承歡學作新人事
事難寄語堂前乾阿嬭
推情還當女兒看

蔭包分受幾雙田荆樹枝多色更鮮
想見鹿車同挽日
裙釵吹滿稻花烟

廿載提攜一旦離滿山花鳥盡依依
明年公子同歸日
池上鴛鴦正學飛

常敬五家臘月蘭花開

幽蘭不知冷殘臘一枝香借暖堪爲佩
含啼若畏霜同
心招柏葉春夢憶瀟湘想爲主人壽
重徵燕姑祥

敬五
是月

香亭寄黃白狐裘

知我山居冷狐裘兩襲胎暖同冬日愛輕與老身宜黃
白金銀氣溫存毛裏思常愁披日少披到夜深時

追憶前事傷老二首

自辭邑宰後久不徒步行偶過桃葉渡街頭踏月明茶
肆坐男子大駭呼而起不料袁宰官一老至斯矣我聞
此語難爲情老不自覺他人驚不知當日作何狀惹他
觸目生惆悵于今又是廿年餘此人再見驚何如

十年前向縣庭行故吏猶能向我迎于今再向縣庭過
識我竟無人一个歷歷同官十數人姓名大槩記難真

自嘆袁安來太早白頭人比甘棠老同官零落吏胥無
始信人生老最孤

王景

記負胡牀從隊長小師家裏唱秧歌而今百戰成功日
不想封王只想他

題魯星村小像

愛春風不戴笠愛徐行不著屐披出一衫青張開兩眼
白胸中忙殺幾首詩旁人不知謂閒立